

全上古三代秦漢三國六朝文

全齊文卷二十五

烏程嚴可均校輯

王植

植永明中爲尚書刪定郎徒校籍郎坐事免

奏上撰定律章表

臣尋晉律文簡辭約旨通大綱事之所質斷難釋張斐杜預同注一章而生殺永殊自晉泰始以來唯斟酌參用是則吏挾威福之勢民懷不對之怨所以溫舒獻辭於失政絳侯抗慨而興歎皇運革祚道冠前王陛下紹興光開帝業下車之痛每慟上仁滿堂之悲有矜聖思爰發德音剛正刑律敕臣集定張杜二注謹礪愚蒙盡思詳撰削其煩害錄其尤衷取張注七百三十一條杜注七百九十一條或二家兩釋於義乃備者又取一百七條其注相同者取一百三條集爲一書凡一千五百三十二條爲二十卷請付外

詳校擿其違謬南齊書孔稚珪傳

王儻之

儻之永明中太常丞

朝堂諱榜議

尊極之名宜率土同諱目可得覩口不可言口不可言則知之者

絕知之者絕則犯觸必眾南齊書王慈傳

杜元懿

元懿永明中為西陵戍主

乞官領攝牛埭稅格啟

吳興無秋會稽豐登商旅往來倍多常歲西陵牛埭稅官格日三

千五百元懿如即所見日可一倍盈縮相兼略計年長百萬浦陽

南北津及柳浦四埭乞為官領攝一年格外長四百許萬西陵戍

前檢稅無妨戍事餘三埭自舉腹心南齊書陸慧曉傳又見咸有臨安志八十九

苟平

苟平南史作苟石字令哲。潁川人。承明中。爲鎮西隨王府西曹書佐。

後上書忤武帝旨。下荆山獄。賜死。

遺王秀之書

僕聞居謙之位。旣刊於易。傲不可長。禮明其文。是目信陵。致夷門之義。燕丹收荆卿之節。皆以禮而然矣。丈夫處世。豈可寂漠。恩榮空爲後代。一丘土。足下業潤重光。聲居朝右。不修高世之績。將何隔於愚夫。僕耿介當年。不通羣品。饑寒白首。望物嗟來。成人之美。春秋所善。薦我寸長。開君尺短。故推風期。德規於相益。實非碌碌。有求於平原者也。僕與足下同爲四海國士。夫盛衰迭代。理之恆數。名位參差。運之通塞。豈品德權行爲之者哉。第五之號。旣無易於驛駢。西曹之名。復何推於長史。足下覓答書。題久之。以君若此。非典。何宜施之於國士。如其循禮。禮無不答。謹以相還。亦何犯於

逆鱗哉君子處人以德不以位相如不見屈於澠池毛遂安受辱
於郢門造敵臨事僕必先於二子未知足下之貴足下之威孰若
秦楚兩王僕以德爲寶足下以位爲寶各寶其實於此敬宜常聞
古人交絕不泄惡言僕謂之鄙無以相貶故薦貧者之贈

南齊書王秀之傳又略見南史四十二豫章王爽傳

與王儉書

足下建高世之名而不顯高世之迹將何以書於齊史哉

南齊書王秀之傳

崔慰祖

慰祖字悅宗清河東武成人永明中爲奉朝請歷始安王撫軍
行墨曹參軍轉刑獄兼記室

臨卒與從弟緯書

常欲更注遷固二史採史漢所漏二百餘事在府篋可檢寫之以

存大意。海岱志。良未周悉。可寫數本。付護軍諸從事。入一通。及友人任昉。徐寬。劉祥。裴揆。令後世知吾微有素業也。南齊書崔慰祖傳。南史七十二

又令

以棺親土。不須博。勿設靈座。南齊書崔慰祖傳

巨雄

雄吳興烏程人

詣闕上書

臣父執節如蘇武。守死如谷吉。遂不書之。良史甄之。褒策萬代之後。誰死社稷。建元四年。車僧朗銜使不異。抗節是同。詔贈正員外郎。此天朝舊準。臣父成例也。今僧朗反葬冢塋。臣父湮棄絕域。語忠烈則亦不謝車。論荼苦則彼優。而此劇。名位不殊。禮數宜等。乞申哀贈。南史七十三。三。冠先傳。永明中。使蠡。蠡見殺。武帝以冠先不辱命。賜其子雄錢一萬。布三十匹。雄不受。詣闕上書云。不省。

謝曇濟

曇濟永明末為國子助教

明堂配饗議

案祭法禘郊祖宗並列嚴祀鄭玄注義亦據兼饗宜祖宗兩配文

武雙祀

尚齊書禮志上陸昌元年有司奏參議明堂成以世祖配國子助教謝曇濟議又見通典四十四雙祀作兼祀

世哀儀議

夫喪禮一制限節兩分虞謝追亡之情小祥抑存之禮斯蓋至愛

可申極痛宜屈耳文皇帝雖君德早疑民化未洽追崇尊極實緣

於性今言臣則無實論已則事虛聖上取寓更奉天眷祇禮七廟

非從三后周忌祥禫無所依設

尚齊書禮志下建武二年正月給事中領國子助教謝曇濟議

江祀

祀字景昌濟陽考城人永明末為南郡王國常侍延興初明帝

引為驃騎東閣祭酒兼祕書丞建武中出為晉安王寶義鎮北

長史南東海太守行南徐州事入爲衛尉卿永泰末奉遺詔爲侍中東昏初與兄祚及劉暄始安王遙光徐孝嗣蕭坦之爲六貴譚謀廢立與祚俱誅中興初贈散騎常侍太常卿

庶諸葛璩於明帝

璩安貧守道悅禮敦詩未嘗投刺邦宰曳裾府寺如其節退可以

揚清厲俗請辟爲議曹從事梁書諸葛璩傳

遣信報兄祚

劉暄似有異謀今作何計齊書江祚傳

瘼炎

炎會稽人初爲博士累遷散騎侍郎驍騎將軍有集七卷

郊壇瓦屋議

誠懇所施止在一壇漢之郊祀養帝甘泉天子自竹宮望拜息殿去壇場既遠郊奉禮畢旋幸於此瓦殿之與帷宮謂無簡格南齊書禮

志上建武二年驍騎將軍虞
炎議又略見通典四十二

鮑照集序

鮑照字明遠本上黨人家世貧賤少有文思宋臨川王愛其才以
 爲國侍郎王薨始興王濬又引爲侍郎孝武初除海虞令遷太學
 博士兼中書舍人一本云時上多忌以文自高越侍左右出爲秣
 陵令又聘永嘉令大明五年除前軍行參軍侍臨海王鎮荊州掌
 知內命尋遷前軍刑獄參軍事宋明帝初江外拒命及義嘉敗荆
 土震擾江陵人宋景因亂掠城爲景所殺時年五十餘身既遇難
 篇章無遺流遷人閒者往往見在儲皇博採羣言遊好文藝片解
 隻韻罔不收集照所賦述雖乏精典而有超麗爰命陪趙備加研
 訪年代稍遺零落者多今所存者儻能半焉宋本鮑照集

虞羲

羲字士光曾稽餘姚人建武初爲前軍參軍卒於晉安王侍郎

有集十一卷

與蕭令王僕射書爲袁象求諡

袁侍中體高亮之宏姿，挺孤奇之逸操。孝友結於衡閭，忠正表於邦域。懷抱七經，該綜百氏。清文麗目，幾義窮神。言非義而不發，容導禮而後動。居貧無悶，事等安期。處顯不驚，道均無歎。兄弟親從，同居共財。怡怡雍穆，人所不聞。願與善無微，報施徒語。岱山委岫，崑岳摧峯。四海搢紳，誰不掩泣。時公德冠時宗，道高物表。若得橫議聖時，斟酌今古，採芟實於當年，標芳流於千載。馳徽諡於山道，潤貞氣於泉門。豈非體國之至公，典謨之盛軌者哉。藝文類聚四十

陶韶

韶，建武初博士。

泄哀儀議

名立義生，自古之制。文帝正號，祖宗式序。昭穆祥忌，禪日皇帝宜。

服祭服出太極泄哀百僚亦祭服陪位南齊書禮志下建武二年正月博士陶邵議

徐景嵩

景嵩建武初國子助教

郊壇瓦屋議

伏尋三禮天地兩祀南北二郊但明祭取犧牲器用陶匏不載人

君偃處之儀今棟瓦之構雖殊俱非千載成例宜務因循南齊書禮志上

建武二年

庾弘遠

弘遠潁川鄆陵人宋吏部尚書炳之子永元中為江州長史

為陳顯達與朝貴書

諸君足下我太祖高皇帝叡哲自天超人作聖屬被宋季綱紀自

頓應禪從民邁此基業世祖武皇帝昭略通遠克纂洪嗣四闕罷

嶮三河靜塵鬱林海陵頓孤負荷明帝英聖紹建中興至乎後王

行悖三才。琴橫凶席。繡積麻筵。淫犯先宮。穢興閭闔。皇陛爲市。塵之所。雕房起征戰之門。任非華尚。寵必寒麻。江僕射兄弟忠言。屬薦。正諫繁興。覆族之誅。於斯而至。故乃狂噬之刑。四剽於海路。家門之繫。一起於中都。蕭劉二領軍。並升御座。共稟遺詔。宗戚之苦。諒不足談。渭陽之悲。何辜至此。徐司空歷葉忠榮。清簡流世。匡翼之功未著。傾宗之罰已彰。沈僕射年在懸車。將念几杖。歡歌園藪。絕影朝門。忽招陵上之罰。何萬古之傷哉。遂使紫臺之路。絕指紳之儔。縷組之閭。罷金張之胤。悲哉。蟬冕爲賤。寵之服。嗚呼。皇陛列劫豎之坐。且天人同怨。乾象變錯。往歲三州流血。今者五地自動。昔漢池異色。胥王因之見廢。吳郡暫震。步生以爲勃倖。况事隆於往。怪燮倍於前虐。此而未廢。孰不可興。王僕射王領軍。崔護軍。中維簡正。逆念剖心。蕭衛尉。蔡詹事。沈左衛。各負良家。共傷時嶮。先朝遺舊。志在名勛。同列丹書。要同義舉。建安殿下。秀德沖遠。實允

神器昏明之舉往聖流言今忝役戎驅亟請乞路須京塵一靜西
 迎大駕歌舞太平不亦佳哉裴豫州宿遣誠言久懷慷慨計其勁
 兵已登淮路申司州志節堅明分見迎合總勒偏率殿我而進蕭
 雍州房僧寄並已纂邁旌鼓將及南兖州司馬崔恭祖壯烈超羣
 嘉驛屢至仁聽烽謀共成脣齒荆郢行事蕭張二賢莫不案劍食
 風橫戈待節關畿蕃守之儔孰非義侶我太尉公體道合聖杖德
 修文神武橫於七伐雄略震於九綱是乃從彼英序還抗社稷本
 欲鳴笳細錫無勞戈刃但忠黨有心節義難遺信次之聞森然十
 萬飛旂咽於九派列艦迷於三川此蓋捧海澆蠻烈火消凍耳吾
 子其擇善而從之無令竹帛空為後人笑也

南齊書陳顯達傳顯
 達率兵合長史庾弘
 遠司馬徐虎
 龍與朝貴書

謝赫

爵里未詳

古畫品

夫畫品者蓋眾畫之優劣也。圖繪者莫不明勸戒著升沈千載寂寥披圖可鑒雖畫有六法罕能盡該而自古及今各善一節六法者何一氣韻生動是也二骨法用筆是也三應物象形是也四隨類賦彩是也五經營位置是也六傳移模寫是也唯陸探微衛協備該之矣然迹有巧拙藝無古今謹依遠近隨其品第裁成序列故此所述不廣其源但傳出自神仙莫之聞見也

第一品 五人

陸探微 事五代宋 賜帝吳人

窮理盡性事絕言象包前孕後古今獨立非復激揚所能稱贊但價重之極乎上上品之外無他寄言故屈標第一等

曹不興 五代吳時事 孫權吳興人

不興之迹殆莫復傳惟祕閣之內一龍而已觀其風骨名豈虛成

案御覽七百五十一歷代名畫記引謝赫云不興之迹代不復見祇閣內一龍頭而已觀其風骨擅名不虛在第一品矣

衛協五代晉時

古畫之略至協始精六法之中迨為兼善雖不說備形妙頗得壯

氣凌跨羣雄曠代絕筆

張墨荀勗

風範氣候極妙參神但取精靈遺其骨法若拘以體物則未見精

粹若取之象外方厭膏腴可謂微妙也

第二品三人

顧駿之

神韻氣力不逮前賢精微謹細有過往哲始變古則今賦彩製形

皆創新意若包犧始更卦體史籀初改書法嘗結構層樓以為畫

所風雨炎燠之時故不操筆天和氣爽之日方乃染毫登樓去梯

妻子罕見畫蟬雀駿之始也宋大明中天下莫敢競矣

陸綏

體韻適舉，風彩飄然。一點一拂，動筆皆奇。傳世蓋少，所謂希見卷軸，故為寶也。

袁蓀

北方陸氏，最為高逸。象人之妙，亞美前賢。但志守師法，更無新意。然和璧微玷，豈貶十城之價也。

第三品 九人

姚曇度

畫有逸方，巧變鋒出。虬魁神鬼，皆能絕妙。同流真為雅鄭兼善，莫不俊拔。出人意表，天挺生知，非學所及。雖纖微長短，往往失之。而輿阜之中，莫與為匹。豈真棟梁蕭艾，可唐突璠璣者哉。

顧愷之

五代晉時晉陵無錫人字長康小字虎頭

格體精微，筆無妄下。但迹不逮意，聲過其實。

毛惠遠

畫體周贍無適不該出入窮奇縱橫逸筆力適韻雅超邁絕倫其揮霍必也極妙至於定質塊然未盡其善神鬼及馬泥滯於體頗有拙也

夏瞻

雖氣力不足而精彩有餘擅名遠代事非虛美

戴逵

情韻連綿風趣巧拔善圖賢聖百工所範荀衛已後實為領袞及乎子暉能繼其美

江僧寶

斟酌袁陸親漸朱藍用筆骨梗甚有師法像人之外非其所長也

吳暉

體法雅媚製置才巧擅美當年有聲京洛

張則

意思橫逸。動筆新奇。師心獨見。鄙於綜授。變巧不竭。若環之無端。景多觸目。謝題徐落云。此二人後不得預焉。

陸杲

體致不凡。跨邁流俗。時有合作。往往出人。點畫之間。動流恢服。傳於後者。殆不盈握。桂枝一芳。足懣本性。流液之素。難效其功。

第四品 五人

蘧道愍

章繼伯

並擅寺壁。兼長畫扇。人馬分數。毫釐不失。別體之妙。亦爲人神。

顧寶先

全法陸家。事事宗稟。方之袁蒨。可謂小巫。

王微

史道碩 五代晉時

並師荀衛。各體善能。然王得其細。史傳其真。細而論之。景玄爲劣。

第五品 三人

劉頊

用意綿密，畫體纖細，而筆跡困弱，形製單省。其於所長，婦人爲最。但纖細過度，翻更失真。然觀察詳審，甚得姿態。

晉明帝

諱紹元帝長子師王廙

雖略於形色，頗得神氣。筆跡超越，亦有奇觀。

劉紹祖

善於傳寫，不閉其思。至於雀鼠，筆跡歷落，往往出羣。時人爲之語，號曰移畫。然述而不作，非畫所先。

第六品 二人

宋炳

炳明於六法，迄無適善，而含毫命筆，必有損益。跡非準的，意足師放。

丁光

雖擅名蟬雀而筆跡輕羸非不精謹乏於生氣

賜進士出身三品銜廣東等處提刑按察使司按察使兼管驛傳事務同王毓藻校刊

全齊文卷二十五終

全齊文卷二十六

烏程嚴可均校輯

闕名

敕

未登黃門郎不得畜女伎

南史二
十四

奏得季子廟沸井

延陵令戴景度稱所領季子廟舊有涌井二所廟祝列云舊井北
忽聞金石聲卽掘深三尺得沸泉其東忽有聲錚錚又掘得泉沸
湧若浪泉中得一銀木簡長一尺廣二寸隱起文曰廬山道人張
陵再拜謁詣起居簡木堅白而字色黃謹案瑞應圖浪井不鑿自
成王者清靜則仙人主之孔氏世錄云叶精帝道孔書明巧當在
張陵宋均注云張陵佐封禪一云陵仙人也南齊書祥瑞志建元
元年四月有司奏

奏請議郊殷禮

郊殷之禮未詳郊在何年復以何祖配郊殷復在何時未郊得先
殷與不明堂亦應與郊同年而祭不若應祭者復有配與無配不
祀者堂殿職僚毀置云何南齊書禮志上建元元年七月有同奏

奏祭明堂

明堂尋禮無明文唯以孝經為正竊尋設祀之意蓋為文王有配
則祭無配則止愚謂既配上帝則以帝為主今雖無配不應缺祀
徐邈近代碩儒每所折衷其云郊為天壇則堂非文廟此實明據
內外百司立議已定如更詢訪終無異說傍儒依史竭其管見既
聖旨惟疑羣下所未敢詳廢置之宜仰由天鑒南齊書禮志上建元元年七月議郊
殿詔可明堂可更詳有司又奏詔依舊

奏請議太子妃喪遇閏

皇太子穆妃以去年七月薨其年閏九月未審當月數閏為應以
閏附正月若用月數數閏者南郡王兄弟便應以此四月晦小祥

至於祥月不為有疑不南齊書禮志下建元三年有司奏

奏請議嗣位郊祀

尋前代嗣位或於前郊年或別始晉宋以來未有盡一今年正月

已郊未審明年應南北二郊祀明堂與不依舊通關八座丞郎博

士議南齊書禮志上建元四年世祖即位其秋有司奏又見通典四十二

奏遷祔應無虞

昭皇后神主在廟今遷祔葬葬有虞以安神神既已處廟改葬出

靈豈應虞祭鄭注改葬云從廟之廟禮宜同從墓之墓事何容異

前代謂應無虞南齊書禮志下建元四年有司又奏

奏復宕昌王梁彌機等官爵

前使持節都督河涼二州軍事鎮西將軍東羌校尉河涼二州刺

史隴西公宕昌王梁彌機前使持節平北將軍西涼州刺史羌王

儉舒彭並著勳西垂寧安邊境可復先官爵南齊書臣羌傳承明元年八座奏

奏請議日蝕廢社

今月三日臘祠太社稷一日合朔日蝕既在致齋內未審於社祠

無疑不

南齊書禮志上承
明元年有司奏

奏定廟樂歌詩

太祖高皇帝廟神室奏高德宣烈之舞未有歌詩郊應須歌辭穆
皇后廟神室亦未有歌辭案傳玄云登歌廟異其文饗神十室同
辭此議爲允又尋漢世歌篇多少無定皆稱事立文並多八句然
後轉韻時有兩三韻而轉其例甚寡張華夏侯湛亦同前式傳玄
改韻頗數更傷簡節之美近世王韶之顏延之並四韻乃轉得賒
促之中顏延之謝莊作三廟歌皆各三章章八句此於序述功業
詳略爲宜今宜依之郊配之日改降尊作王禮殊宗廟穆后母儀
之化事異經綸此二歌爲一章八句別奏事御奉行

南齊書樂志
永明二年尙

書殿中
曹奏

奏楊後起功狀

後起勤彰款塞忠著邊城

南齊書氏羌傳永明二年八月座奏

奏請議釋奠釋菜

宋元嘉舊事學生到先釋奠先聖先師禮又有釋菜末詳今當行

何禮用何樂及禮器

南齊書禮志上永明三年正月有司奏

奏封楊集始母

集始驅狐剪棘仰化邊服母以子貴宜加榮寵除集始母姜氏太

夫人假銀印

南齊書氏羌傳永明五年有司奏

奏魚復侯子響宜還本

子響體自聖明出繼宗國大司馬臣疑昔未有肩所以因心鞠養

陛下弘天倫之愛臣疑深猶子之恩遂乃繼體扶疏世祚垂改茅

蔣菴蔚豕嗣莫移誠欣悖睦之風實虧立嫡之教臣等參議子響

宜還本

南齊書魚復侯子響傳永明六年有司奏

奏進楊炅位號

楊炅嗣勤西牧，馳款內昭，宜增戎章，用輝遐外。進號前將軍。南齊書氏

堯傳永明九年八座奏

奏定文惠太子喪服

御服暮，朝臣齊衰三月。南郡國臣齊衰暮，臨汝曲江國臣並不服。

六宮不從服。南史四十四

參議鬻封不應在解例

鬻封應在解例。參議以戎夷疏爵，理章列代，酋豪世襲，事炳前葉。

今宸麻改物，舊冊杓降，而梅生等保落奉政，事須繩總，恩命升符。

有異常品，謂宜存名，以訓殊俗。南齊書鬻封應在解例參議以云云

參議太子妃石誌

墓銘不出禮典，近宋元嘉中，顏延之作王球石誌，素族無碑策，故

以紀德。自爾以來，王公以下，咸共遵用，儻妃之重，禮殊恆列，既有

哀策謂不須石誌南齊書禮志下建元二年有司奏大明故事太子妃立宮中有石誌參議

參議江斲子出繼

開世立後禮無其文荀顛無子立孫墜禮之始何期又立此論義

無所據南齊書江斲傳初宋明帝敕斲出繼從叔孫為從祖停後於是僕射王儉啟可以斲小兒繼孫為孫尚書參議云云

於是斲還本家

難何佟之社稷位向議

郊特牲又云君之南向蒼陽也臣之北向蒼君也若以陽氣在南

則位應北向陰氣在北則位宜向南今南北二郊一限南向皇帝

黑瓚階東西向通典作今一郊一社南向皇帝真幣東西向故知壇墠無繫於陰陽設

位靈拘於南北羣神小祠類皆限南面薦饗之時北向行禮蓋欲

申靈祇之尊表求幽之義魏世秦靜使社稷別營稱自漢以來相

承南向漢之於周世代未遠鄙上類基商丘餘樹猶應尚存迷方

失位未至於此通儒達識不以爲非庾蔚之昔已有此議後徐爰

周景遠並不同仍舊不改南齊書禮志上永明十一年何佟之議以為社北向復東向儀曹稱治禮學士

議又見通

典四十五

討始安王遙光符

逆順之數皎然有徵干紀亂常刑茲罔赦蕭遙光宗室蚩庸才行鄙薄緹裙可望天路何階受遇自昔恩加猶子禮絕帝體寵越皇季旗章車服窮千乘之尊闔隍爽盥踰百雉之制及聖后在天親受顧託話言在耳德音猶存侮蔑天明罔畏不義無君之心履霜有日遂乃稱兵內犯竊發京畿自古巨蠹莫斯為甚今便分命六師弘宣九伐皇上當親御戎輒弘此廟略信賞必罰有如大江南齊書始安王遙光傳尚書符遙光

移虜淮陽太守文

永明十年太歲某淮陰太守某移淮陽長大齊乘乾得一情靜今皇上體聖居震績戎昌緒仁澤之所灑沾惠風之所偃靡威武之

所騰驟刑政之所宣暢浩浩乎其不可涯涘固能徼岷崑關夷海
拓沙渚道零山八脣承嗣九垓禔福含齒戴髮其樂只且所以通
歡魏境靜息邊民嗟爾黔氓共和優忝而魏主不篤我信誓侮弱
我慈懷憑陵我南城寇擾我樊鄧元帥逞梟鳶之心銳卒齧蜂虻
之毒蠅飛藩棘蟻附池隍我聊命偏將執而俘之連左衽於郊門
頻編首於外闕有司將加誅焉天子弗之許也重謁而請天子又
不許也更從請所以置之乃制詔曰昔虞帝欽明苗山記倒戈之
陣夏君踵武鈞臺載不戰之兵今鋒鏑陵邊彤雲入候加討而後
擒待征而知服此乃朕之涼德彼將何德徒哀其積習爲性因次
遂變不識天時用干人事雖同濱率境自隔王臣直曰斯民獨爲
係虜父母生乖妻兒則桑梓悠悠墳塋萬里情甚悲之可解網改
祝聽歸巢穴豈直鄰好足鄙特以哀矜自中以時資遣稱朕意焉
已遵明詔部送所虜若干人卽日在界宜速近護時施故堡使幽

荒之外知皇王之德音故移

文苑英華 六百五十

鼎銘

作寶鼎齊臣萬年子孫承寶

南齊書祥瑞志永明三年越州南高涼俚人海中網魚獲銅獸一頭銘曰

云云

聖文

坤維聖帝永昌

外國

百濟王

牟大牟都孫宋末襲位

乞聽除所假姐瑾等封爵表

上報功勞勤實存名烈假行靈朔將軍臣姐瑾等四人振竭忠效

攘除國難志勇果毅等威名將可謂并城固蕃社稷論功料勤官

在甄顯今依例輒假行職伏願恩愍聽除所假靈朔將軍面中王

妯瑾歷贊時務武功並列今假行冠軍將軍都將軍都漢王建威將軍八中侯餘古弱冠輔佐忠效夙著今假行監朔將軍阿錯王建威將軍餘歷忠款有素文武烈顯今假行龍驤將軍邁盧王廣武將軍餘固忠效時務光宣國政今假行建威將軍弗斯侯

南齊書東

傳

又表

臣所遣行建威將軍廣陽太守兼長史臣高達行建威將軍朝鮮太守兼司馬臣楊茂行宣威將軍兼參軍臣會邁等三人志行清亮忠款夙著往太始中比使宋朝今任臣使冒涉波險尋其至效宜在進爵謹依先例各假行職且玄澤靈休萬里所企況親趾天庭乃不蒙賴伏願天監特愍除正達邊效夙著勤勞公務今假行龍驤將軍帶方太守茂志行清壹公務不廢今假行建威將軍廣陵太守邁執志周密屢致勤效今假行廣武將軍清河太守

南齊書東

傳

乞聽除所假沙法名等封爵表

臣自昔受封世被朝榮忝荷節鉞剋攘列辟往姐瑾等並蒙光除
臣庶咸泰去庚午年獫狁弗悛舉兵深逼臣遣沙法名等領軍逆
討宵襲靈擊匈犁張惶崩若海蕩乘奔追斬僵尸丹野由是摧其
銳氣鯨暴韜凶今邦宇諡靜實名等之略尋其功勳宜在褒顯今
假沙法名行征虜將軍邁羅王贊首流爲行安國將軍辟中王解
禮昆爲行武威將軍弗中侯木於那前有軍功又拔臺舫爲行廣
威將軍面中侯伏願天恩特愍聽除

南齊書東夷傳建武
二年大遣使上表

又表

臣所遣行龍驤將軍樂浪太守兼長史臣慕遣行建武將軍城陽
太守兼司馬臣王茂兼參軍行振武將軍朝鮮太守臣張塞行揚
武將軍陳明在官忘私惟公是務見危授命蹈難弗顧今任臣使

冒涉波險盡其至誠實宜進爵各假行署伏願聖朝特賜除正

書來
夷傳

邢基祗羅迴

邢基祗羅迴芮芮國相

奉表

夫四象稟政二儀改度而萬物生焉斯蓋虧盈迭襲麻敷自然也
昔晉室將終楚桓竊命實賴宋武匡濟之功故能扶衰定傾休不
以秦祚流九葉而國嗣不繼今皇天降禍於上宋室猜亂於下臣
雖荒遠粗闕圖書數難以來星文改度房心受變虛危納祉宋滅
齊昌此其驗也水運遘屯木德應運子年垂劉穆之記醫嶺有不
在之山京房讖云卯金十六草肅應王歷觀圖緯休徵非一皆云
慶鍾蕭氏代宋者齊會有使力法度及闕此國使反採訪聖德彌
驗天縱之姿故能挾隆皇祚光權定之業翼亮天功濟悖主之難

樹勳京師威振海外仗義之功侔蹤湯武冥績既著寶命因歸受
終之祿歸於有道況天帝無常族有德必昌時來之數惟靈是與
陛下承乾啟之機因乘龍之運計應符革祚久已踐極荒裔傾戴
莫不引領設未能飛不宜冲挹上達天人之心下乖黎庶之望皇
丙承緒肇自二儀拓土載民地越滄海百代一族大業天固雖吳
漢殊域義同唇齒方欲剋期中原龔行天罰治兵繕甲俟時大舉
振霜戈於并代鳴和鈴於秦趙埽殄凶醜梟翦元惡然後皇輿還
幸光復中華永敦鄰好侔蹤齊魯使四海有奉蒼生咸賴荒餘歸
仰豈不盛哉

南齊書芮芮虜傳宋昇明二年太祖輔政遣驍騎將
軍王洪軌使芮芮建元二年三年芮芮頻遣使上書

扶南王

王姓僑陳如名闍耶跋摩宋末襲位

遣天竺道人釋那伽仙上表

扶南國王臣僑陳如闍耶跋摩叩頭啟曰天化撫育感動靈祇四

氣調適伏願聖主尊體起居康豫皇太子萬福六宮清休諸王妃
主內外朝臣普同和睦鄰境士庶萬國歸心五穀豐熟災害不生
土清民泰一切安穩臣及人民國土豐樂四氣調和道俗濟濟並
蒙陛下先化所被咸荷安泰

臣前遣使齎雜物行廣州貨易天竺道人釋那伽仙於廣州因附
臣船欲來扶南海中風漂到林邑國王奪臣貨易并那伽仙私財
具陳其從中國來此仰序陛下聖德仁治詳議風化佛法興顯眾
僧殷集法事日盛王威嚴整朝望國軌慈愍蒼生八方六合莫不
歸伏如聽其所說則化鄰諸天非可爲喻臣聞之下情踴悅若暫
奉見尊足仰慕慈恩澤流小國天垂所感率土之民並得皆蒙恩
祐是以臣今遣此道人釋那伽仙爲使上表問訊奉貢微獻呈臣
等赤心并別陳下情但所獻輕陋愧懼唯深伏願天慈曲照鑒其
丹款賜不垂責

臣有奴名鳩酬羅委臣逃走別在餘處構結凶逆遂破林邑仍自立爲王永不恭從違恩負義叛主之讐天不容戴伏尋林邑昔爲檀和之所破久已歸化天威所被四海彌伏而今鳩酬羅守執奴凶自專狼彊且林邑扶南鄰界相接親人是臣奴猶尙逆去朝廷遙遠豈復遵舉此國屬陛下故謹具上啟伏聞林邑頃年表獻簡絕便欲永隔朝廷豈有師子坐而安大鼠伏願遣軍將伐凶逆臣亦自效微誠助朝廷翦撲使邊海諸國一時歸伏陛下若欲立餘人爲彼王者伏聽敕旨脫未欲灼然興兵伐林邑者伏願特賜敕在所隨宜以少軍助臣乘天之威殄滅小賊伐惡從善平蕩之日上表獻金吾婆羅今輕此使送臣丹誠表所陳啟不盡下情謹附那伽仙并其伴口具息聞伏願慈所啟并獻金鏤龍王坐像一軀白檀像一軀牙塔二軀古貝二雙瑠璃蘇鉢二口瑠璃檳榔梓一枚

南齊書南夷扶南傳永明二年開耶
跋摩遣天竺道人譯經伽伽上表

釋氏

那伽仙

那伽仙天竺道人永明二年為扶南國上表奉貢

上書

吉祥利世間感攝於羣生所召其然者天感化緣明仙山名摩耽
 吉樹敷嘉榮摩醯首羅天依此降尊靈國王悉蒙祐人民皆安寧
 由斯恩被故是召臣歸情菩薩行忍慈本迹起凡基一發菩提心
 二乘非所期歷生積功業六度行大悲勇猛超劫數財命捨無遺
 生死不為厭六道化有緣具修於十地遺果度人天功業既已定
 行滿登正覺萬善智圓備惠日照塵俗眾生感緣應隨機授法藥
 佛化徧十方無不蒙濟權皇帝聖宏道與隆於三寶垂心覽萬機
 威恩振八表國土及城邑仁風化清皎亦如釋提洹眾天中最超
 陛下臨萬民四海共歸心聖慈流無疆被臣小國深

南齊書扶南
傳那伽仙詣

京師言其國事摩醯首羅天神神常降於
摩耽山土氣恆暖草木不落其上書云云
釋玄暘

玄暘姓趙河西金城人涼州出家宋元嘉中達揚州齊永明初
終於京師

致傳珍書

貧道棲荆累稔年衰疹積厭毒人誼所以遠託岷界卜居斯阜在
廣陽之東去城千步逶迤長互連壘疊嶺嶺開四澗互列五峯抱
郭懷邑迴望三方負巒背岳遠矚九流以去年四月二十三日創
功覆簣前冬至此訪承爾日正是陛下龍飛之辰蓋聞道配太極
者嘉瑞自顯德同一儀者神應必彰所以河洛兩有周之兆靈石
表大晉之徵伏謂茲山之符驗豈非齊帝之靈應邪檀越奉國情
深至使運屬時徵不能忘心豈能遺事輒疏山讚一篇以露愚抱
讚曰峩峩齊山誕自幽冥潛瑞幾昔帝號乃明岑戴聖字兆祚休

名巒根雲坦峯岳霞平規嚴擬剎度嶺縮經創工之日龍飛紫庭

道侔二儀四海均清終天之祚岳德表靈

釋藏聖二高僧傳八又尹八

訶黎跋摩傳

訶黎跋摩者宋稱師子鐵佛泥洹後九百年出在中天竺婆羅門子也若人之生也固亦命世而誕幼則神期秀拔長則思周變通至若世典園陀並是陰陽奇術提舍高論又亦外誥情辨皆經耳而究其幽遇心而盡其妙直以世訓承習弗爲心要也遇見梵志導以真軌遂抽簪革服爲薩婆多部達摩沙明究摩羅陀弟子其師既器而非凡卽訓以名典迦旃延所造大阿毗曇乃有數千偈而授之曰此論蓋是眾經之統例三藏之要目也若能專精尋究則悟道不遠於是跋摩敬承鑽習功不踰月皆精其文義乃慨然而歎曰吾聞佛旨虛寂非名相所議神澄妙絕罕常情攸測故爲先達之所尊崇我亦注心歸仰如今之所稟唯見浮繁妨情支離

善志紛紜名相竟無妙異若以爲先聖應期適時之漸斯則教之流非化之源矣遂乃敷載之中窮三藏之旨攷九流之源方知五部創流盤之基迦旃攷偏競之始紛綸遺蹤謀方百轍由使歸宗者昧其繁文尋教者惑其殊軌夫源同未異乃將衰之徵然藕網不振亦弘道者之憂也遂抗言五異辯正眾師務遵洪範當而不讓至乃斂捷鋒起苞籠羣達辯若懸河清對無滯于時眾師雷動相視闕如後以他日集而議曰此子恃明凌轍舊德據言有本未易可傾邁年值此運也如何或有論者曰豈唯此子才明過人抑亦吾等經論易窮耳意謂學無自足闇則諮明明昧之分已自知何爲苟守偏誠不師廣見邪諸耆德曰相與誠復慕明情深而忝世宗仰於茲久矣當不能忽廢舊業問道少年明矣何者夫根同葉散像散自然五部之異有自來矣但常敦其素業祇而行之既生屬千載之末孰能遠軌正法之初哉且跋摩抽簪之始受道

吾黨中參異學。已自離羣。夫師祖不同。所以五部不雜。點異之制。蓋先師舊典。幸可述其獨見之明。以免雷同之眾。跋摩既宏才放達。廣心遠度。雖眾誚交詆。傲然容豫。深體忘懷。明遊常趣。神用閒邃。擇木改步。時有僧祇部僧住巴連弗邑。並遵奉大乘。云是五部之本。久聞跋摩才超羣彥。爲眾師所忌。相與慨然。要以同止。遂乃研心方等。銳意九部。采訪微言。搜簡幽旨。於是博弘百家。眾流之談。以檢經奧。通塞之辯。澄汰五部。商略異端。攷襲迦旃延。斥其偏謬。除繁乘末。募存歸本。造迷明論。厥號成實。崇附三藏。準列四道。大明荃極。爲二百二品。志在會宗。先隆遺軌。庶廢乖競。共遵通濟。斯論既宣。淵懿嚮萃。旬日之間。傾震摩竭。於時天竺有外道論師。云是優樓佉弟子。明鑿縱達。每述譏正之辯。歷國命誦。莫能制者。聞華氏王崇敬三寶。將阻其信情。又欲振名殊方。遂杖策恆南。直至摩竭。王聞不悅。卽宣募境內有能辯屈之者。當奉爲國師。闔境

衆彥皆憚其高名。咸曰：才非跋摩，孰堪斯舉？王聞甚悅，卽敕奉迎。跋摩旣至，王便請升論堂，令與外道決其兩正。於時外道志氣干雲，乃愾然而詠曰：吾大宗樓迦偉籍世師，繁文則六諦同貫，簡旨則知異於神，神爲知王，唯斷爲宗。敢有抗者，斬首謝焉。跋摩旣宏才邈世，覩之杪然，神期凌霄，容無改顏。乃慨然對曰：異哉！子之談也。子所以跨遊殊方，將欲崇其神而長其知也。又以斷爲宗而自誣其旨，子無知乎？神可亡乎？神旣非知爲神知，知知神乎？若神知知，知神者誰知？若知神知亦神乎？外道乃退，自疑曰：理必若斯，我無知矣。知若知神，神非宗矣。於是沈惟謝，風心形俱伏。王及臣民慶快非恆，卽與率士奉爲國師。王乃譏其舊眾，昔忌名賢，本眾相視，懷愧闕然，咸共追遜，固請舊居。王又曰：夫制邪歸正，其德宏矣。但弘教之賢，業尙殊背，乖迂遺莖，濁亂像軌，請以檢一，令謬昧歛明。王卽宣告，號爲像教。大宗由使八方論士，淵異之徒，感恩舊津。

明契而萃，跋摩已絕倫之才，超羣之辯，每欲師聖，附經藉同，雖
遂博舉三藏，開塞之途，大壯五部，非競之路，難其所執，釋其所難，
明辯恢廓，苞羅眾說，理亂叫機，神王若無，於是羣方名傑，莫能異
見，咸廢殊謀，受道真軌，消化以之，而隆邪，靄以之，再騫，非夫神契
實津，道參冲旨，孰能盪定羣異，合廢我求道者哉，所以粗述始末，
垂諸好事云爾。

釋藏
百一

釋智林

智林，高昌人，宋泰始初，入京，住靈基寺，齊永明末，還本國卒。

致周顯書

近聞檀越敘二締之新意，陳三宗之取舍，聲殊恆律，雖進物不速，
如貧道鄙懷，謂天下之理，唯此爲得焉，不如此非理也，是以相勸，
速著紙筆，比見往來者，聞作論已成，隨喜充徧，特非常重，又承檀
越恐立異當時，干犯學眾，製論雖成，定不必出聞之譽，然不覺悲

悲此義旨趣似非初開妙音中絕六十七載理高常韻莫有能傳
貧道年二十時便參得此義常謂藉此微悟可以得道竊每歡喜
無與共之年少見長安耆老多云關中高勝乃舊有此義當法集
盛時能深得斯趣者本無多人既犯越常情後進聽受便自甚寡
傳過江東略無其人貧道捉麈尾已來四十餘年東西講說謬重
一時其餘義統頗見宗錄唯有此途白黑無一人得者貧道積年
乃爲之發病既衰痾未愈加復旦夕西旋願唯此道從今永絕不
言檀越天機發緒獨創方寸非意此音猥來入耳且欣且慰實無
以況建明斯義使法燈有種始是眞實行道第一功德雖復國城
妻子施佛及僧其爲福利無以相過既幸已詮述想便宜廣宣使
賞音者見也論明法理當仁不讓豈得顧惜眾心以失奇趣邪若
此論已成遂復中寢恐檀越方來或以此爲巨障往之懇也然非
戲論矣想便寫一本爲惠貧道齋以還西使處處弘通也比小可

牽曳故入山取斂深企付之

高僧傳八南齊書周顒傳廣弘明集二十四南史三十四

釋道盛

道盛俗姓朱沛國人宋明帝時入京住天保寺為僧綱領終於

齊

上蕭驃騎啟論檢試僧事

昇明元年丹陽尹沈文季建議責僧屬籍欲行沙汰道盛啟

天保寺釋道盛啟昔者仲尼養徒三千學天文者則戴圓冠學地

理者則履方屨楚莊周詣哀公曰蓋聞此國有知天文地理者不

少請試之哀公即宣令國內知天文者戴圓冠知地理者著方屨

來詣門惟有孔丘一人到問無不對故知餘者皆為竊服矣釋迦

興世說四諦六度制戒威儀舍利佛等皆得羅漢故知大法非為

無宗但自爾已來人根轉鈍去道懸遠習惑纏心若能隔意則合

律科不爾皆是竊服者伏願陛下聖明深恕此理弗就凡夫求聖

人之道昔鄭子產稱曰大賢尚不能收失為申徒嘉所譏況今未

問當作門

法比丘。寧能收失。若不收失。每起惡心。寺之三官。何日堪命。國有典刑。願敕在所。依罪治戮。幸可不亂。聖聽盛雖老病。遠慕誦木。敢以陳聞。伏紙流汗。謹啟。宏明集十二

釋弘充

弘充涼州人。大明末。過江爲湘宮寺綱領。終于齊。

新出首楞嚴經序

首楞嚴三昧者。蓋神通之龍津。聖德之淵府也。妙物希微。非器像所表。幽玄冥湛。豈情言所議。冠九位以虛昇。果萬行而圓就。量種智曰窮賢。絕殆庶而靜統。用能靈臺十地。扃鑰法雲。罔象環中。神圖自外。然心雖澄一。應無不周。定必凝泊。在感斯至。故明宗本。則三達同寂。論善救則六度彌綸。辯威效則強魔懼淪。語眾變則百億星繁。至乃徵號龍上。晦跡塵光。像告諸乘。有盡無滅。斯皆參定之真功。成能之顯事。權濟之樞綱。勇伏之宏要矣。羅什法師弱齡

言道思通法門昔紆步闕右譯出此經白雲布已來競辰而衍中
興啟運世道載昌宣傳之盛日月彌懋太宰江夏王該綜羣籍討
論淵敏每覽茲卷特深遠情充以管昧賞罰玄肆預遭先匠啟訓
音軌參聽儒緣髣髴文意以皇宋大明二年歲次奄茂於法言特
舍略爲注解庶勉不習之傳敢慕我聞之義如必紕謬以俟君子

釋藏
跡七

釋慧琳

慧琳未詳

案宋元嘉中有釋慧琳姓劉徙交州卒此諱云建武四年別是一人也廣宏明集云南齊釋慧琳

新安寺釋玄運法師諱并序

維建武四年五月八日甲午沙門玄運右卧不興神去危城嗚呼
哀哉法師本譙邦右族寓于敦煌幼稟端明仁和之性長樹宏懿
冲間之德真粹天挺夙鑒道勝乃遺擯俗纏超出塵礙濯景玄津
棲習法道率由儀律之絕精學體微之妙潛仁晦名之行散畜忘

相之施無得而稱者日夜而茂焉。敷說架乎當時。理思冠乎中世。鑽仰之徒。自遠而來。虛至實歸。徧於轍跡。帝后儲貳之尊。藩英鼎宰之重。莫不捐道宗師。瞻猷結敬。而宏量邃奧。不以貴賤舛其願。眇夷整淵深。不以寒暑品其懷抱。所以總綜象末。崇振積流者。法師其人矣。敎訓之緣有限。負手之歌會終。風火告徵。愈恬明於危識。靈聖滅現。屢恭悅於告漸。春秋六十九。嗚呼哀哉。外稟哽識。內諮慟魂。慕題往迹。行實浮言。乃作詩曰。

世滯悠曠。苦海遐長。欲善修掩。愛網宏張。法燈不曜。慧日霾光。朽宅燭仆。炎火浮揚。二儀構毀。算其有處。三轉廓遠。空劫誰計。從冥詎曉。淪川莫濟。接踵既疏。實資命世。日誕明哲。降靈自絲。涵微蘊器。有表孩年。神機幼徹。凝鑿草宣。猶玉初瑩。若珠啟泉。疵厭塵濁。超悟玄微。諛捨愚縛。澄煎情違。韶年植節。卅歲從師。承規檢敬。肅範儀威。秉躬滄潔。淑慎心行。學辨祕源。問窮理奧。前隱用招。往寤

斯鏡匠佚工倍。思高業盛。爰自中歲。綽奧宏廣。輪演法空。雲游日
朗。乘衡若夷。擁門似敞。悠悠品類。式是宗仰。右河振聞。左江標秀。
聲因德宣。稱緣道富。提獎詢求。悅懌研授。仁厚猶地。志高如岫。輟
餐赴曠。捨繡矜寒。蓄無停日。財以施殫。蓋賤傲色。匪貴愉顏。湛茲
懿慶。均彼藉蘭。教之所洽。晦識斯明。習之所誘。務以心成。接昏茂
貨。撫迷諒情。憑微請要。莫不成亨。險路恆遠。開引有極。生滅相揮。
念念匪息。徂年寡留。西光遽逼。雲變豈停。將運淨域。嗚呼哀哉。體
深病苦。慮達四疾。鍼石醫巫。分割貶失。端情法旅。正想慈律。不捨
界勤。誓拯羣物。嗚呼哀哉。合既終離。假會應謝。同悲素林。寂然中
夜。談人勸善。瞻天儼駕。卽彼紺宮。去此塵舍。嗚呼哀哉。絕微言於
永沒。毀舟航於遐溢。揆崇臺之嚴華。蕪峻堂之雕麗。捨形有其若
遺。遷情靈其何界。資訓仰兮眷徒。空血淚兮感逝。嗚呼哀哉。廣宏
明集

二十
三

三法真

法真住湘宮寺

見梁高僧傳八附僧宗傳

登羅浮山疏

又有筋竹色似黃金

齊民要術十

越王鳥狀似鳶口句未可受二升許南人以爲酒器珍於文螺不踐地不飲江湖不啜百草不餌蟲魚唯啜木葉糞似薰陸香山人遇之既以爲香又治雜瘡御覽九百二十八

五距鳥足有重距其音先願或謂之先願鳥似孔雀背連錢文同上

荔枝冬青夏至日子始赤六七日可食甘酸宜人其細核者謂之

焦核荔枝之最珍也御覽九百七十一

羅浮山有沙棠華黃赤實味甘如李御覽九百七十二

越王擣薰陸香御覽九百八十一

旃檀出外國元嘉末曾有人於山見一大樹圓蔭數畝三丈餘圍

辛芳酷烈其間枯條數尺援而刃之乃白旃檀街覽九百八十二

沈香葉似冬青樹形崇竦其木枯折外皮朽爛內乃香山雖有此樹而非香所出新會高涼土人斫之經年肉爛盡心則爲沈香出北景縣樹極高大土人伐之累年須外皮消盡乃割心得香同上

釋僧巖

僧巖俗姓趙北海人州舉秀才不就

與青州刺史劉善明書辭舉秀才

貧道弱齡出家早達俗務游心釋風志乖孔教雖復道場未卽故亦洙訓緬矣方將委質餒獸庶超九劫之功分肌哺鴿情存乘雲之馭盛能垂翼中田反跡籠樊捨夫途中之適嬰茲廟堂之累哉且夫官人以器位必須才未有叨越分之舉終能保其榮也今輒奉還板命願收過恩無令曹公重歎王舟再慙補秀之召非所克堪釋僧巖呈宏明集十一

再與劉刺史書

案弘明集
非常作表

將辱還誨，優旨仍降。徵莊援釋，理據皎然。徒欲仗義辨情，未由也。
 已。雖高義出眾，微言入神。鄙懷所執，猶或可曉。何者？夫知人者哲，
 自審者明。忘分昧進，良所未安。昔成直應命，終獲滅名之斬。遵祖
 聘能，卒招揚鶴之恥。若遣我欲效彼，追蹤王呂，恐曝鯁龍津，點額
 覆矣。盜所盜器，與盜同罪。舉失其才，亦賓主交鄙。可不慎乎？又禮
 云：非指玉帛，孝乎豈止保膚。故割肌無譏於前代，斷髮有加於鼻
 辰。斯蓋斬手全軀，所全者大。夫何怪者？願貸愚執，賜遂陋襟。釋僧
 嚴呈。宏明集十一

三與劉刺史書

比日之事，為可聊作一樂。不謂恩旨綢繆，芳音驟屆，勞誨之厚。一
 至於斯，伏讀未周。媿汗交集，然鄙志區區，已備前款。且嚴之壯也，
 猶後於人。今既老矣，豈能存為。夫以耄耄之年，指麾成務，此自蒼

靈特授假手天功。協佐龍飛之英。翼贊革命之主。今欲以東畝之
農夫。西園之籽叟。側景前光。參蹤古烈。無異策駕。足以均躡。驅繫
澤雉。以雙鸞鶴。斯之不倫。寧俟深察。昔子秦伏命。撫節公孫。豫報
智伯。漆身靡悔。今日過賞。德粹兩賢。正恨年逼。崦嵫命急。濛汜吞
炭。倒戈。永與願隔。臨紙惻愴。固識所陳。幸收過眷。不復翻覆。釋僧
晨呈

宏明集十一

釋玄光

玄光俗姓時代未詳

案論中引陸修靜事修靜南齊人
宏明集此論編在梁劉勰之前

辯惑論 并序

夫六返邈。萬化無際。塵遊夢境。染惑聲華。緣想增譎。奚識明政。
由滄風瀾薄。使眾魔紛競矣。若矯詐謀榮。必行五逆。威強導蒙。
必施六極。蟲氣霾滿。致患非一。念東吳遺水仙之見。西夷載鬼
卒之名。閩鼓畱種民之穢。漢葉惑思子之歌。忠賢撫歎。民治陵

歇攬地沙草。盜數其罪。涓流未學。莫知宗本。世教訛辭。詭蔽三
寶。老鬼民等。詠差盈路。皆是炎山之煨燼。河雒之渣糝。淪湑險
難。余甚悼焉。聊詮往迹。庶鏡未然。照迷童於互鄉。顯妙趣於塵
外。休風冥被。彼我情判。豈是言聲所能據寫。

禁經上價一逆

夫言籍雲舒。貫空有之美。聖賢功績。何莫由斯。實學者之淵海。生
民之日月。所以波濤菩薩。慈悲等照。震電光於炎塗。弭魔賊於險
澤。汎靈舟於信風。接浮生於苦海。問道諸經。製雜凡意。教述邪險。
是故不傳。怪哉道化。空被禁錮。觀今學者。不顧嚴科。但得金帛。便
與其經。貧者造之。至死不罷。貪利無慈。逆莫過此。又其方術穢濁。
不清。乃扣齒爲天鼓。咽唾爲醴泉。馬屎爲靈薪。老鼠爲芝藥。賢此
求道。焉能得乎。昔秦皇漢武。不獲輕身。使徐福公孫。遠冥雲波。祈
候通仙。影響無陳。夫閑心祛欲。則事與道鄰。豈假躑涉之勞。咽唾

嗑齒者乎。

妄稱真道二逆

夫質懋纁霞者言神丹之功開明淨智者必礪花之氣雖保此爲真而未能無終況復張陵妄稱天師既侮慢人鬼卽身受報漢興平未爲蟒蛇所噓子衡奔尋無處畏負清議之報譏乃假設權方以表靈化之迹生糜鴝足置石崖頂謀事辦畢剋期發之到建安元年遣使告曰正月七日天師昇玄都米民山猿蟻集闕外雲臺治民等稽首再拜言伏聞聖駕玄都臣等長辭蔭接尸塵方享九幽方夜衡入久之乃出詭稱曰吾旋駕辰華爾各還所治淨心持行存師念道衡便密抽遊胃鶴直衝虛空民猴愚戀僉言登仙販死利生欺罔天地

合氣釋罪三逆

夫滅清去欲則道心明眞羣斯班姓妄造黃書呪癩無端以伏輕

軍作鶴

誚乃開命門抱真人嬰兒戲龍虎作如此之勢用消災散禍其可
然乎其可然乎漢時儀君行此爲道觥魅亂俗被斥敦煌後至孫
恩佚蕩滋甚士女溷漫不異禽獸夫色塵易染愛結難消况交氣
丹田延命仙穴肆兵過玉門之禁變態窮龍虎之勢生無忠貞之
節死有青庭之苦誠願明天檢鏡斯輩物我端清莫負冥詔

俠道作亂四逆

夫冥宗難曉譬華易惑緣累重淵獄德輕風露如黃巾等竊望漢
室反易天明罪悉伏誅次有子魯復稱鬼道神祇不佐爲野廩所
突末後孫恩復稱紫道不以民賤之輕欲圖帝貴之重作雲響於
幽竄發妄想於空玄水仙惑物枉殺老稚破國壞民豈非兇逆是
以宋武皇帝惟之慨然乃龍飛千里虎步三江掩撲羣妖不勞浹
辰含識懷懼草木春光

章書代德五逆

夫至化餘塵不可誣蔽詮謚靈魄務依明德道無真體安逐妖空
輒言東行醉酒後故如此頑膏靈非陋僻又遷達七祖文意凌薄
乞免擔沙石長作道鬼夫聖智窮微有念斯照何煩祭酒橫費紙
墨若必須辭訴然後判者始知道君無立墜之能天曹無天眼之
照三官疲於謹案伺吏勞於討捕聞其奏章本擬急疾而戊辰之
日上必不達不達太上則生民枉死嗚呼哀哉實爲五逆

畏鬼帶符妖法之極一

夫真心履順者妖忤革其氣是以至聖高賢無情於萬化故能洞
遊金石臥宿烟霞此純誠感通豈佩帶使然哉其經辭致娉慢鬼
癸云左佩太極章右佩昆吾鐵指日則停暉擬鬼千里血若受黃
書赤章言卽是靈仙碩屐入靖不朝太上至於使六甲神而跪拜
圍廁愚癡顛倒豈識儀節聞其著符昔時軍標張角黃符子魯戴
絳盧棟紫標孫恩孤虛並矯惑王師終滅人鬼

制民課輸欺巧之極二

夫五斗米教出自天師後生邪濁復立米民世人厭畏是以子明杜恭俱困魔蜚又塗炭齋者事起張魯臣夷難化故制斯法乃驢騾泥中黃鹵泥面擲頭懸柳埏埴使熟此法指在邊陲不施華夏至義熙初有王公其次貪竇憚苦竊省打拍吳陸修靜甚知源僻猶塗揆額懸糜而已癡僻之極幸勿言道

解廚纂門不仁之極三

夫開闢大施與物通美左道餘氣乃纂門解廚矜身與食懷隴班之態昔張子魯漢中解福大集祭酒及諸鬼卒酣進過常遂致階逸醜聲遐布遠達岷方劉璋敎曰夫靈仙養命猶節松霞而厚身嗜味奚能尚道子魯聞之憤恥意深罰其埽路世傳道士後會舉標以防斯難兼制廚令酒限三升漢末已來謂爲制酒至王靈期削除聲目先王道民並具賑錫雖有五利之貴更爲妖物之名

度尾苦生虛妄之極四

夫質危秋蒂命薄春冰業風吹蕩蓬迴化境所以景公任於緣命孫子記爲行尸迷徒湫學不識大方至有疾病衰禍妄甚妖祟之原淵鬼鸛以爲災渡危尾於遐川詹鈞星於懸溜雪丹章於華山乃蹙顰眉貌談詭真鬼云三官使者已送光歸逝者故然空喪辭貨斯實祭規巾精之利蠶食百姓公私並損致使火宅驚於至聖歸歌動於人思矣

夢中作罪頑癡之極五

夫天屬化始乃識照爲原棄捨身命草木非數然大地上山莫非我故塵滄川瀰漫皆是我淚血以此而觀誰非親友或夢見先亡幘云變怪夫人鬼雖別生滅固同恩愛之情時復影響羣邪無狀不識逆順召食鬼吏兵奏章斷之割截幽靈單心誰照幸願未來勿尙迷言使天堂無輟食之思冰河靜災念之聲

輕作寒暑兇佞之極六

夫淵默心口者萬行之真德而塵界眾生率無慈愛虺兇耶佞符章競作懸門貼戶以誑愚俗高賢有識末之安也造黃神越章用持殺鬼又制赤章用持殺人趣悅世情不計殃罪陰謀懷嫉經有舊準死入鐵鉗火獄生出鴟鵂瘡癩精骸惛朽淪離永劫誰知斯乎老鬼民輩道相不然事之宜賢夫諫刺雖苦智者甘聞故略致言幸試三思能拂迹改圖卽與大化同風矣良其不革請俟明德備照罄曲以曉長夜豈是今日弱辭所陳哉

宏明集八

闕名

百句譬喻經記

永明十年九月十日中天竺法師求那毗地出修多羅藏十二部經中抄出譬喻聚爲一部凡一百事天竺僧伽斯法師集行大乘爲新學者撰說此經

釋藏卷九

善見律毗婆沙記

齊永明十年歲次實沈三月十日禪林比丘尼淨秀聞僧伽跋陀羅法師於廣州共僧禱法師譯出梵本善見毗婆沙律一部十八卷京師未有渴仰欲見僧伽跋陀羅其年五月還南越上寫來以十一年歲次大梁四月十日得律還都頂禮執讀敬寫流布仰惟世尊泥洹已來年載至七月十五日受歲竟於眾前謹下一點年年如此感慕心悲不覺流淚釋蘇百一

僊道

孟景翼

景翼吳興人為道士

正一論

寶積云佛以一音廣說法老子去聖人抱一以為天下式一之為妙空玄絕於有境神化瞻於無窮為萬物而無為處一數而無數

莫之能名。強號爲一。在佛曰實相。在道曰玄牝。道之大象。卽佛之法身。以不守之守。守法身以不執之執。執大象。但物有八萬四千行。說有八萬四千法。法乃至於無數。行亦達於無央。等級隨緣。須導歸一。歸一曰回向。向正卽無邪。邪觀旣遺。億善日新。三五四六。隨用而施。獨立不改。絕學無憂。曠劫諸聖。共遵斯一。老釋未始於嘗分。迷者分之而未合。億善徧修。修徧成聖。雖十號千稱。終不能盡。終不能盡。豈可思議。

齊書顧歡傳
而史顧歡傳

賜進士出身。一品銜廣東等處提刑按察使司按察使兼管驛傳事務舊同王毓藻校刊